



Inatsisartunut ilaasortaq,
Pele Broberg, Naleraq

§ 37 naapertorlugu apeqqummut nr. 2025-95-imut akissut

Inatsisartut Suleriaasianni § 37, imm. 1 naapertorlugu Tusass qaammataasaqarfiillu pillugu Naalakkersuisunut apeqquteqarputit.

Apeqqutigineqartut tullinnguuttuni akineqarput.

Apeqqut 1. Naalakkersuisut siulittaasuata Jens-Frederik Nielsen (Demokraatit) piginnittut sinnerlugit ingerlatsivik inuiaqatigiit pigisaannut Tusass A/S-imut akisussaasuunerpaava?

Akissut: Aap. Suliassaqarfiit agguataarneranni aktiaateqarluni ingerlatseqatigiiffiit Naalakkersuisut Siulittaasuata piginnittutut akisussaaffigai.

Apeqqut 2. Tusass A/S arlaannaatigullu Pisortaqarfiit aallaavigeqqaarnagit, kiffaanngissuseqartumik qaammataasianut nittartagaqarsinnaalernissamut, soorlu OneWeb, Starlink, assigisaanullu attavinissinnaanissamut periarfissaqarsinnaalissaagaanni inatsisit piumasaqaatillu sorliit allanngortinneqartariaqarpat?

Akissut: § 37 naapertorlugu apeqqutigineqartut akiniarneranut atugassanik Ineqarnermut, Attaveqaasersuutitut Isorliunerusunullu Naalakkersuisoqarfimmit akissutissanik pissarsiortoqaarsimavoq, imatullu akissuteqarpoq:

“Qaammataasakkut nalunaarasuartaatitigut attaveqarneq Nalunaarasuar-taatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaat nr. 31, 23. november 2017-imeersumit aammalu TELE Greenland A/S-imut akuersissut pillugu Namminersornerullutik Oqartussat nalunaarutaat nr. 18, 22. november 1999-imeersumit malittarisassaqaartinneqarpoq.”

Apeqqut 3. Atuisut, soorlu Nunatta Kangiani Avanersuarmilu, kiffaanngissuseqartumik qaammataasianut nittartagaqarnissamut akiliisinnaatitaalerlutik attavinissinnaalerunik, Tusass A/S isertitakinnerunissaannut Naalakkersuisut aarleqquteqarpat? Taamaappat isertitaqannginnerunissamut annertussusaa katillugit akeqquneqarpoq.

16-07-2025
Suliap normua: 2025 - 391
All. normua, 22954854

Postboks 1015
3900 Nuuk
Oqarasuaat (+299) 34 50 00
Fax (+299) 32 50 02
Mail: govsec@nanoq.gl
www.naalakkersuisut.gl

Akissut: § 37 naapertorlugu apequtigineqartut akiniarneranut atugassanik Ineqarnermut, Attaveqaasersuutitut Isorliunerusunullu Naalakkersuisoqarfimmit akissutissanik pissarsiortoqarsimavoq, imatullu akissuteqarpoq:

“Tusass A/S, akuersisummik piginnittusoq, avaqqullugu qaammataasakkut internetimut attaveqalersitsisoqassappat, sumiiffimmi pineqartuni akuersisummik allannguuteqartoqanngippat atorunnaarsitsisoqassaaq. Taamatut allannguissamut tunngaviit aalajangersaqaarnagit kingornalu aningaasaqarnikkut kingunerutaasussat naatsorsoqqaarnagit Tusass A/S-imut aningaasaqarnikkut kingunissat naatsorsorneqarsinnaanngillat. Taamaammat § 37 naapertorlugu apequteqaammut atatillugu isertitaqannginnerunissaq qanoq annaasaqaatigineqassanersoq oqaatigineqarsinnaanngilaq.

Nassuiaat: “Qaammataasat: Periarfissat navianartuusinnaasullu” 5. november 2024-mi Inatsisartunut nassiuuneqartoq aamma innersuussutigineqarpoq.”

Apequt 4. Isorliunerusut qaammataasiat aalajangersimaqqissaartut aqutugalugit Tusass A/Simiit nittartagaqartinneqartut attaveerutsinneqarsimatillutik attaveqanngissimanerminnut akiliutigisimasaannik utertoofigitittarpat?

Akissut: § 37 naapertorlugu apequtigineqartut akiniarneranut atugassanik Tusass A/S-imit akissutissanik pissarsiortoqarsimavoq, imatullu akissuteqarpoq:

“Piumasaqaatitsinni immikkoortoq 14.b naapertorlugu (https://www.tusass.gl/assets/support/terms/Generelle_vilkaar_privatkunder_final.-2018.08.01.pdf) ajutoornermik nalunaaruteqarnermit ullut suliffiusut tallimat sinnerlugit Tusassip tamanut ammasumik nalunaarasuartaatitigut attaveqartitsinerani kipisoortoqarsimappat taarsiiffigitittoqarsinnaavoq. Qaammatini kingullerni pingasuni ingerlatsinermit unittoornerit tallimaapput, kipisoortitsinerillu tamarmik akunnerit 24-t inorlugit sivilissuseqarlutik. Kingullermik kipisoortoqarmat kipisoorneq akunnernik 12-13-inik sivilissuseqarpoq.

Tamanna tunngavigalugu isorliunerusuni internetimik atuisunut taarsiisoqarsimanngilaq.”

Apequt 5. Tusass A/S arlaatigut sinneqartoornissaminut Naalakkersuisuniit, tassa piginnittuniit, piumasaqarfigineqartarpa? Taamaappat ukiuni kingullerni sinneqartoqqusineri qanoq annertutiginersut akeqquneqarpoq.

Akissut: Namminersorlutik Oqartussat aktiaateqarluni ingerlatseqatigiiffii ukiut tamaasa sinneqartoorteqartarnissaannik Naalakkersuisut naatsorsuuteqarput, ingerlatseqatigiiffiillu ilaat ukiumoortumik iluanaarutini akiliuteqartarnissaat isumaqatigiissutigineqarlutik, tassunga Tusass A/S ilaavoq. Taamatulli iluanaarutini akiliuteqarneq

siulersuisunit innersuussutigineqartariaqarluni ataatsimeersuarnermilu
akuerineqassalluni.

Ukiumi naatsorsuusiorfiusuni Tusass A/S imatut iluanaarutinin akiliuteqartarsimavoq.

2020: 112,6 mio. kr., 2021: 87,6 mio. kr., 2022: 87,6 mio. kr., 2023: 87,6 mio., 2024: 87,6
mio. kr.

**Apeqquut 6. Tusass A/S qanoq annertutigisumik aningaasatigut taperneqartarpat,
soorlu TV/Radio-kkut aallakaatitsisinnanissamut allanullu, aningaasat katillugit?**


Akissut: § 37 naapertorlugu apeqqutigineqartut akiniarneranut atugassanik
Ineqarnermut, Attaveqaasersuutitut Isorliunerusunullu Naalackersuisoqarfimmit
akissutissanik pissarsiortoqarsimavoq, imatullu akissuteqarpoq:

“Tusass A/S Nunatta Karsianit tapiiffigineqarneq ajorpoq.

*Suliasanik immikkuullarissunik suliarinninnissamut Naalackersuisut Tusass A/S-imik
isumaqatigiissuteqartarpoq aamma Naalackersuisut suliffeqarfiutillit allat peqatigalugit
isumaqatigiissuteqartarlutik. Ineqarnermut, Attaveqaasersuutitut Isorliunerusunullu
Naalackersuisoqarfiup Naalackersuisoqarfiit ataasiakkaat Tusassimik qanoq
amerlatigisunik isumaqatigiissuteqarnerut tamakkiisumik ilisimasaqarfiginngilaa.*

*KNR-ip TV-mik Radiumillu aallakaatitsisarnissaanut isumaqatigiissut allaavoq, tassa
Radiukkut tv-kkullu aallakaatitsisarneq pillugu Inatsisartut Inatsisaat nr. 7, 8. juni 2014-
imeersumi allaqqammat Nalunaarasuartaatitigut atassuteqarneq nalunaarasuar-
taatitigullu kiffartuussinerit pillugit Inatsisartut inatsisaat naapertorlugu
Naalackersuisut taamaallaat akuersissuteqartumik isumaqatiginninniarsinnaasoq,
taannalu tassaalluni Tusass A/S. Aningaasanut inatsimmi isumaqatigiissummut
tassunga ukiumut 26 mio. kr. immikkoortinneqartarput. Radiukkut TV-kkullu
aallakaatitsisarnissaq pillugu Naalackersuisut Tusass A/S-imik
isumaqatigiissuteqarsimanngippata KNR-ip aallakaatitassiani aallakaatinnissaat
nammineq isumagisassagaluarpaa.”*

Inussiarnersumik inuulluqqusillunga



Jens Frederik Nielsen
Naalackersuisut Siulittaasuat